

Wngqcingz Hawj Ciuhvunz Ndaej Ik

影响一生的践诺



Gou mwh iq gig dam guhcaemz, baez ndaej guhcaemz gijmaz hagsib ha, lijsiengj ha cungj lumz liux, hagsib cingzcik gou youq ndaw ban itcig dwg baiz youq doeklaeng. Vihliux gou hagsib miz cinbu, bohme hagsib gijmaz banhfap cungj yungh lo, hoeng mbouj miz saek di yungh.

Mwh hwnj siujhag seiq nienz-gaep, ndaw ban dah cei q gyaue Vangz Siujyah bingh lo, boh de daiq de bae ndaw sengsingz yawj bingh. Dauqma le, Vangz Siujyah naeuz, boh de daiq de bae bozvuzgvani ndaw sengj yawj canjlanj lo, baihdaw ndei yawj dangqmaz. Doengzhag ndaw ban gig hozhaenz Vangz Siujyah, gou hix dwg.

Ma daengz ranz, gou dawz aen daehsaw gveng daengz gwnz mbonq bae, doiq daxboh naeuz: “Boh, cuengq sujyay le, mwngz daiq gou bae bozvuzgvani ndaw sengj yawj canjlanj ba, Vangz Siujyah ban gou cungj bae yawj gvaq lo.”

Daxboh dinghdingh yawj gou yaep ndeu, yienzhaeuh gig sangj dapwngq: “Siengj bae bozvuzgvani? Ndaej ha, daxboh daiq mwngz bae!” Gou rox, daxboh moix baez dapwngq ndaej sangjswt, baihlaeng itdingh miz aen diuzgen he. Dahraix, daxboh youh naeuz: “Mwngz geizmued gaujsi ndaej baiz youq cib mingz gaxgonq, gou itdingh hawj mwngz bae bozvuzgvani yawj canjlanj!” Ha! Cib mingz gaxgonq? Ban gou gungh miz sei q cib ngeih boux hagseng, hawj gou mbat ndeu daj dauqgeq daih’it mingz yamq daengz cib mingz gaxgonq, yamq neix daiq hung luba?! Hoeng vihliux ndaej bae bozvuzgvani yawj canjlanj, gou couh moeb naj gawh dang bouxbiz, daegdaengq soengset naeuz: “Ndaej ha, mbouj couh dwg cib mingz gaxgonq ma!”

Daj mwhhaenx hwnj, gou lumj bienqbaenz lingh boux vunz he nei. Youq ndaw goqdangz, gou nyinhcaen

dingq lauxsae gangjoq, mbouj caiq lumj gaxgonq yienghhaenx doeng yawj sae muengh, roxnaeuz ngaem gyauej guh siujdungcoz. Roengzdangz le, gou nyinhcaen guh cozyez, mbouj rox couh cam boux doengzhag hagsib ndei haenx. Moix ngoenz cuengqhag ma ranz le, gou mbouj caiq okbae guhcaemz, sij sat cozyez le, couh yawhsien yawj goqsaw ngoenz daihngaih yaek hwnj haenx. Faenh ndaemndai he, couh ndaej faenh soundaej he. Daengz geizmued gaujsi, gou gauj ndaej ndaw ban daihbet mingz. Gou angqvauvau dawz mbawdan cingzcik hawj daxboh yawj, daxboh yawj le angq dwk aenbak cungj haep mbouj ndaej. Yienghneix gou couh swngzhgei cam daxboh: “Boh, raeuz ngoenz lawz bae bozvuzgvani yawj canjlanj ha?” Daxboh lwgda daj mbawdan cingzcik cienq daeuj yawj gou, angqvauvau naeuz: “Ngoenzriengh raeuz couh bae.” Ngoenz daihngaih banhaemh, gou ninz youq ndaw mbonq, moengj-moengj doengjdoengj dingqnyi daxboh caeuj daxmeh gangjvah.

Daxmeh naeuz: “Mwngz caen siengj daiq Siujluz bae ndaw sengj yawj gijmaz canjlanj ha?”

Daxboh naeuz: “Dangyienz lo, wngqcingz daeglwg couh itdingh doiqyienh.”

Daxmeh youh cam: “Gij cienz bae sengsingz gaeuq la?”

Daxboh naeuz: “Gai duz yiengz he, wnggai gaeuq lo.”

Daxmeh youh yousim cam: “Cienz dwg gaeuq lo, hoeng mwngz lienz yienhsingz cungj caengz bae gvaq, bae sengsingz mwngz rox loh lwi?”

Daxboh riu naeuz: “Yawj mwngz gangj neix, baihlaj aenndaeng mbouj dwg miz aen bak he ha, mbouj rox cam vunz ha!”

Ngoenz daihsam, gou caeuj daxboh naengh hwnj aen hojceh hai bae coh sengsingz ……

Daxboh wngqcingz gij vah de gangj haenx, mboujdan son rox gou ngoenzlaeng baenzlawz guh vunz, guh saeh, hix gajbienq ciuhvunz gou. Daj mwhhaenx hwnj, gou roengzrengz hagsib, gaenxgyaek doegsaw. Yiengh-neix gou itloh hwnj cuhcungh, gauhcungh. Doeklaeng gauj hwnj swhfan dayoz sengsingz, bizyez le baenz boux lauxsae cunghyoz sonsaw gyauej vunz he.

(Dungj Caizluz)

Siujsaengq Coengmingz

贵港市覃塘区蒙公乡高占小学三(2)班 陆星宇

Youq ndaw sei qgyaiq gou, doengzdoi h gou mbouj dandan dwg it ngeih boux, dwg baenz bang bae. Mboujgvaq, baengzyoux cei q ndei vanzlij dwg Siujsaengq.

De ya, maj miz doi q da ndongqliklik ndeu, song fwngz youh hung youh miz rengz, byoemgyaeuj ndaemndatndat, aendungx biz de ciengzseiz loh ok noh hau daeuj, vamingz de dwg “daegbiz”, de youh coengmingz youh haengj bang vunz, youq ndaw ban gyoengq doengzhag heuh de guh “fouz dig Audwznan”.

Geiq ndaej miz baez ndeu, gou caeuj de bae cauhsi cawx doxgaiq. Gou caeuj de ngamq okdou, couh yawjraen boux daxbuz byoemgyaeuj hau ndeu caeuj boux lwgmbauq ndeu doxceng, boux lwgmbauq haenx ndangsang 1.8 mij doxhwnj. Siujsaengq doi q gou naeuz: “Raeuz bae yawjyawj!” Gou caeuj de ndwn youq gizhaenx yawj yaep ndeu, cij rox vihmaz doxceng. Laxlawz dwg boux lwgmbauq haenx haep daxbuz aeu ngaenz, boux daxbuz byoemgyaeuj hausaksak haenx mbouj hawj de. Boux lwgmbauq haenx gig hozndat, couh yungh rengz nyoengx daxbuz bat ndeu, daxbuz saemxsaemx saxsax doi q dauqlaeng, ceng di laemx roengz. Gyoengqvunz cungj yungh lwgda yawj mbouj hwnj haenx bae yawj boux lwgmbauq haenx, hoeng cungj mbouj miz saek boux vunz bae naeuz boux lwgmbauq neix. Siujsaengq simgip raixcaix, de mwh gip bienq gvai hemq naeuz: “Gingjaz daeuj lo,



gingjaz daeuj lo.” Boux lwgmbauq haenx dingqyi naeuz miz gingjaz daeuj, gipmuengz cienq ndang couh buet. Boux lwgmbauq haenx buet deuz le, gyoengqvunz cungj yaengx mehfwngz hwnjdaeuj haenh naeuz: “Daeg lwg’iq neix caen coengmingz, nienzgeij iqiq couh rox yienghneix gyaepdeuz boux vunzvaih.” Siujsaengq naeuz: “Docih daihgaya haenh gou.” Gangj sat de couh angqvauvau dwk gaem fwngz gou bae cawx doxgaiq lo.

Siujsaengq caen coengmingz, gou gig boiqfug de!

(指导老师:覃红梅)

Valiux Mbin Bae Lo

柳絮飞了

Seizcin daengz lo, dienheiq yied daeuj yied raeuj lo. Gyoengq siujbaengzyoux vuenh hwnj buhmoq seizcin, byaij ok ranz bae singzrog youz. Vagolix yawjraen le, cak ok ndawrunj daxmeh, hix buet okdaeuj guhcaemz lo.

Valiux daenj geu vunj hau ndeu, soengsoeng yungzyungz, unqnemq mbaeumbet, songsong samsam comz youq doxcaez, couh lumj nyeuq siet he, youh lumj benq fwj he. Gyoengqde baez daeujdaengz gyangmbwn, couh engq angq lo, miz mbangj gyaep, miz mbangj buet, miz mbangj lij fandingqdaeuj. Gou lumj dingqnyi gij singriu gyoengqde lo.

Valiux mizyinx lai lo. Gou siengj gaebdawz gyoengqde, cingj gyoengqde caeuj gou guhcaemz yaep he. Seizhaenx, cingq ngamj miz nyeuq va he mbin coh gou. Gou ganjgip gop song fajfwngz, gaebdawz gyoengqde. Gou siengj sijsaeq yawjyawj valiux dauqdaej maj baenzlawz yiengh, hoeng mwh aj song fajfwngz, gyoengqde gingqyienz vaiqvet mbin deuz lo.

Valiux mbin bae lo, gou riu lo.

(it nienzgaep Sung Sinhyui)